

## ЭРДЭНЭ РЕСУРС 3-Р УЛИРЛЫН САНХҮҮГИЙН ТАЙЛАН БОЛОН ХӨНДИЙ АЛТНЫ ТӨСЛИЙН ТАЛААР ТАНИЛЦУУЛЛАА

### Хэвлэлийн Мэдээ

Нова Скошиа, Халифакс хот  
2019.11.12

Эрдэнэ Ресурс Девелопмент Корпораци (TSX:ERD | MSE:ERDN) (“Эрдэнэ Ресурс” эсвэл “Компани” гэх) нь 2019 оны 9 сарын 30-нд дуусгавар болсон гурав болон есөн сарын санхүү, үйл ажиллагааны тайлан болон Европын Сэргээн Босголт, Хөгжлийн Банк (“EBRD”)-ны оролцоотой санхүүжилтийн талаар шинэ мэдээллийг танилцуулахад таатай байна. Компанийн SEDAR (“System for Electronic Document Analysis and Retrieval”)-т бүртгэгдсэн 2019 оны 3-р улирлын Санхүүгийн тайлан, Үйл ажиллагааны тайлан (“MD&A” буюу “Удирдлагын хэлэлцүүлэг ба дүн шинжилгээ”) ба Жилийн эцсийн мэдээллийн эмхтгэл (“AIF”) нь энэхүү хэвлэлийн мэдээний салшгүй нэг хэсэг болно.

### Компанийн Эшлэл:

Эрдэнэ Ресурсийн ерөнхийлөгч, гүйцэтгэх захирал Петер Акерли хэлэхдээ: “Бид төсөл хөгжүүлэлтийн чухал зорилтуудаа биелүүлсээр байгаад сэтгэл хангалуун байна. Үүнд EBRD-тай хийсэн санхүүжилтийн хэлцэл, урьдчилсан ТЭЗҮ болон хайгуулын үйл ажиллагааны амжилтуудыг дурдаж болно. Ингэснээр бид Хөндий Алтны Төслийг олборлолтын шатанд хүргэх ба Хөндий Алтны Дүүргийн өндөр агуулга бүхий алтны нөөцийг тэлэх зэрэг хоёр үндсэн зорилгодоо хүрэхэд ойртсоор байна.”

“Бидний танилцуулсан урьдчилсан ТЭЗҮ нь өндөр агуулгатай илээр олборлох боломжтой Хөндий Алтны Төслийн үнэ цэнийг баталгаажуулсан бол 2019 оны 3-р улирлын хайгуулын хөтөлбөрийн үр дүнгээр бид Баян Хөндий ордын хязгаараас гадна өрөмдлөгийн үр дүн, Хар Морь (“Dark Horse”) хэмээх шинэ бүсийг нээсэн явдал нь ашиглалтын тусгай зөвшөөрлийн талбайд алтны нөөцийг нэмэгдүүлэх боломжтойг харууллаа.”

“EBRD-ийн стратегийн санхүүжилтийг хүлээн авснаар Алтны Төслийн эцсийн ТЭЗҮ (“Feasibility Study” эсхүл “FS”)-г дэмжих инженерчлэлийн болон тусгай зөвшөөрлийн ажлуудыг эхлүүлээд байна. Бид 2020 оны дундуур олборлолтын шийдвэрийг гарган, 2021 оноос алт үйлдвэрлэж эхлэхээр зорьж байна.” хэмээн Петер Акерли танилцууллаа.

### 2019 оны 3-р улирлын онцлох үйл явдлууд:

### Хөндий Алтны Төсөл – 100% Эрдэнэ Ресурсийн эзэмшил

- > Tetra Tech Inc-ийн боловсруулсан NI 43-101 Техникийн Тайлангийн эерэг үр дүнг танилцуулсан бөгөөд энэхүү тайланд Баян Хөндийн урьдчилсан ТЭЗҮ, Алтан Нарын шинэчилсэн АШЭЗТ багтсан:
  - > Баян Хөндийн урьдчилсан ТЭЗҮ-д татварын дараах өнөөгийн цэвэр үнэ цэн (5% хорогдуулалт бүхий) (“NPV5%”) \$97 сая ам.доллар болон дотоод өгөөжийн түвшин (“IRR”) 42% хэмээн тооцоологдов.

- > Үүний зэрэгцээ Алтан Нарын шинэчилсэн АШЭЗТ-д татварын дараах өнөөгийн цэвэр үнэ цэн (5% хоргодуулалт бүхий) (“NPV5%”) болон дотоод өгөөжийн түвшин (“IRR”) нь тус бүр \$24 сая ам.доллар болон 92%-аар тайлагнасан бөгөөд Баян Хөндий төслийн дэд бүтцийг ашиглан, үйлдвэрлэлийн хоёрдугаар үе шат болгон хөгжүүлэхээр тусгасан.
- > Баян Хөндийн урьдчилсан ТЭЗҮ-д танилцуулснаар ашиглалтын хугацаанд татвар болон элэгдлийн өмнөх ашиг нийтдээ \$211 сая ам.доллар байна.
- > Уурхайн ашиглалтын хугацааны хүдрийн дундаж агуулга нь Баян Хөндийн урьдчилсан ТЭЗҮ-д 3.73 г/т, Алтан Нарын АШЭЗТ-д 3.46 г/т байхаар тодорхойлогдсон.
- > Баян Хөндийд 3.16 г/т дундаж алтны агуулга бүхий 520,700 унц баттай болон бодит геологийн нөөц (“Measured and Indicated Resources”) тодорхойлогдсон нь 2018 оны 9 сард тайлагнасан нөөцийн тайлангаас 20% өссөн үзүүлэлт юм.
- > Баян Хөндийд 3.7 г/т дундаж алтны агуулга бүхий 422,000 унц батлагдсан ба магадласан үйлдвэрлэлийн нөөц (“Proven and Probable Reserves”)-ийг тооцоолов.
- > Уурхайн ашиглалтын хугацаа 11 жил, үүнд: уурхай байгуулах 1 жил, Баян Хөндий ордын ашиглалтын хугацаа 6 жил, Алтан Нар ордын ашиглалтын хугацаа 3 жил байхаас гадна уурхайн хаалтын хугацааг 1 жил байхаар төлөвлөсөн.
- > Баян Хөндийн урьдчилсан ТЭЗҮ-д тодорхойлсноор жилд олборлох алтны дундаж хэмжээ 61,000 унц бол Алтан нарын АШЭЗТ-д тодорхойлсноор жилд олборлох алтны дундаж хэмжээ 45,300 унц, мөнгөний дундаж хэмжээ 205,000 унц байна.
- > Баян Хөндийн урьдчилсан ТЭЗҮ-д нэг унц алт үйлдвэрлэх нийт нэгжийн өртөг (“AISC”) нь \$746 ам.доллар, Алтан нарын шинэчилсэн АШЭЗТ-д нэг унц алттай дүйцэх (“AuEg”) нийт нэгжийн өртөг нь \$931 ам.доллар байхаар тусгасан. (Хүснэгт 1-ийн тэмдэглэл 4-тэй танилцана уу.)
- > Баян Хөндийн анхны хөрөнгө оруулалт 40 сая ам.доллар болон Алтан Нарын нэмэлт хөрөнгө оруулалт 2 сая ам.доллар байхаар тооцоолсон.
- > Баян Хөндийн урьдчилсан ТЭЗҮ-д тодорхойлогдсон эргэн төлөгдөх хугацаа: 2 жил
- > Монгол улсад оруулах өгөөж өндөр, уурхайн ашиглалтын хугацаанд Аж Ахуйн Нэгжийн Орлогын Албан Татвар (ААНОАТ), Ашигт Малтмалын Нөөц Ашигласны Төлбөр (АМНАТ) ба бусад татвар, хураамжид 82 сая ам.доллар төлж, Баянхонгор аймагт 300 гаруй шинэ ажлын байр бий болгоно.
- > 2019 оны 8 сарын 5-нд Баян Хөндийн ашиглалтын тусгай зөвшөөрлийг авсан:
  - > Ашиглалтын тусгай зөвшөөрөл нь 30 жилийн хугацаатай олгогдсон бөгөөд 70 жил хүртэл сунгах боломжтой.
  - > 2019 оны 11 сарын 1-нд Алтан Нарын нөөцийг бүртгүүлж, Монгол улсын Эрдэс Баялгийн Мэргэжлийн Зөвлөлийн зөвшөөрлийг авсан бөгөөд 2019 оны эцэст ашиглалтын тусгай зөвшөөрлийг авна гэсэн хүлээлттэй байна.
- > Sustainability East Asia-аар ахлуулан, Байгаль Орчин, Нийгмийн Нөлөөллийн Үнэлгээг (“ESIA”) боловсруулж байна:
  - > 9-р сард суурь судалгаа, мэдээлэл цуглуулах ажлыг гүйцэтгэснээр нөлөөллийн үнэлгээг боловсруулах, нөлөөллийг бууруулах төлөвлөлтийг эхлүүлсэн.
  - > Баян Хөндийн Байгаль Орчин, Нийгмийн Нарийвчилсан Нөлөөллийн Үнэлгээний олон нийтийн хэлэлцүүлгийг 2019 оны 4-р улиралд холбогдох захиргааны байгууллагад өргөдөл гаргахаас өмнө хийж гүйцэтгэнэ.
  - > Нөлөөллийн үнэлгээ болон удирдлагын төлөвлөгөөг 2019 оны 4-р улирлын эцэст эцэслэхээр төлөвлөж байна.
- > 9-р сард Хөндий тусгай зөвшөөрлийн талбайд хайгуулын болон нарийвчилсан өрөмдлөгийн хөтөлбөрийг гүйцэтгэсэн:

- > Өмнөд Баян Хөндийн үргэлжлэл: Баян Хөндий ордоос өмнө зүгт 350 метрт өрөмдлөг хийсэн бөгөөд үүнд өндөр агуулга бүхий Баян Хөндийн алтны ордтой адил шинж чанар бүхий галт уулын нэгдлийн хувирал бүхий алтны эрдэсжилт огтолсон.
- > Хар Морь нь Баян Хөндий ордоос хойд зүгт 4.5 км-т Хөндий ашиглалтын тусгай зөвшөөрлийн талбайд 32.9 г/т алтны агуулга бүхий чулуулгийн дээж авснаар шинээр нээн илрүүлсэн бүс юм.
- > Баян Хөндий – Страйкер ба Мидфийлд бүс: BKD-269 цооногт хийсэн нарийвчилсан өрөмдлөгөөр 2.4 г/т алтны агуулга бүхий 32 метрийн интервал, BKD-270 цооногт хийсэн өрөмдлөгөөр 1.7 г/т алтны агуулга бүхий 37 метр интервал огтолж, Баян Хөндий ордын эрдэсжилт үргэлжилж байгааг тодорхойллоо.
- > Хойд Хөндий ба Төв Структурын Бүсийн үр дүн: Хойд Хөндийд гүндээ кварцын штокверк болон брекчийн хувирсан монзонит огтолсныг бататгаж, Төв Структурын Бүсэд сульфидээр баялаг, хувирсан галт уулын нягт үелсэн чулуулаг оршиж байгааг тогтоосон.
- > Боловсруулалтын усны нөөцийн өрөмдлөг ба судалгаа:
  - > Баян Хөндий ордыг түшиглэн байгуулагдах уулын баяжуулах үйлдвэрийн технологийн ус хангамжийн эх үүсвэрт шаардлагатай ус ашиглалтын нөөцийг тодорхойлох 6 цооног бүхий талбайг олж тогтоосон.
  - > Төлөвлөсөн хээрийн ангийн байрлалтай ойролцоо хоёр худгийг өрөмдөж гаргасан.
  - > Оны эцэст ус ашиглалтын нөөцийг холбогдох төрийн удирдлагын байгууллагаар хэлэлцүүлж баталгаажуулна.
- > 2019 оны 4-р улирлын хайгуул ба техникийн хөтөлбөрийг эхлүүлсэн:
  - > Компанийн 51% эзэмшлийн Улаан тусгай зөвшөөрлийн талбайд 700 метрийн өрөмдлөгийн хөтөлбөрийг төлөвлөснөөс: хувирлын систем байгааг шалгах (650 метр) өрөмдлөг, (-200 метр) дөт гүний хоёр цооног шинээр өрөмдөх хөтөлбөрүүд багтаж байна.
  - > Геотехникийн судалгаагаар эцсийн ТЭЗҮ-д багтах уурхайн ханын налуу илүү бодитоор тодорхойлох, ингэснээр хөрс хуулалтын харьцааг бууруулах боломжтой.
  - > Геофизикийн түүвэрлэлт, тайлал хийх хөтөлбөрийг төлөвлөж байгаа нь тусгай зөвшөөрлийн талбайд шинэ өрөмдлөгийн бүсийг тодорхойлоход чиглэсэн.

### Санхүүгийн онцлох мэдээлэл

- > Европын Сэргээн Босголт, Хөгжлийн Банкны оролцоотой 8 сая канад долларын санхүүжилтийн багц зарласан:
  - > Энэхүү санхүүжилтийн багцад: хөрвөх нөхцөлтэй зээлийн 5 сая ам.долларын (6.6 сая кан.доллар) гэрээг баталгаажуулж, түүнтэй зэрэгцэн 1.6 сая кан.долларын зуучлалгүй, хаалттай санхүүжилт багтсан.
  - > Хөрвөх нөхцөлтэй зээлийн эхний санхүүжилт болон хаалттай хөрөнгө оруулалтын эхний хэсэг болох 4.1 сая кан.долларын санхүүжилтийг хүлээн авсан бөгөөд эцсийн санхүүжилтийг 11 сарын сүүлээр хаахаар төлөвлөж байна.
  - > Хөрөнгө оруулалт нь төслийн хөгжүүлэлтийн шийдвэрүүдийг санхүүжүүлэхэд чиглэнэ.
- > 2019 оны 9 сарын 30-нд дуусгавар болсон гурван сарын хугацаанд Компанийн нийт алдагдал \$638,379 байсан нь 2018 оны мөн үеийн \$743,484-тэй харьцуулахад буурсан үзүүлэлт юм.
  - > Капиталжуулсан зардлыг оролцуулсан хайгуулын зардал нь \$1,745,752 байсан бөгөөд өнгөрсөн оны \$1,609,985-тай харьцуулахад өссөн үзүүлэлт юм. Энэхүү зардал нь хэдийгээр урьдчилсан ТЭЗҮ хийхэд зардал өссөн боловч өрөмдлөгийн үйл ажиллагаатай холбоотой зардлын бууралтаас үүдэлтэй.
  - > Компанийн захиргаа, удирдлагын зардал (мөнгөн бус, хувьцаанд суурилсан нөхөн төлбөр болон элэгдлийг оролцуулахгүй) нь \$216,372 байсан нь өнгөрсөн оны мөн үеийн \$307,473-тэй харьцуулахад

буурсан үзүүлэлт юм. Энэ нь боловсон хүчний өөрчлөлттэй холбоотой зардал буурсан болон гүйцэтгэлийн урамшууллын хугацаатай холбоотой.

## Санхүүжилтийн тухай

2019 оны 10 сарын 15-нд Эрдэнэ Ресурс нь Европын Сэргээн Босголт, Хөгжлийн Банк (“EBRD”)–ны оролцоотой 8 сая кан.долларын санхүүжилтийн багцыг танилцуулсан. Энэхүү багцад EBRD-тэй 5 сая ам.долларын хөрвөх нөхцөлтэй зээлийн гэрээ хийснээс гадна, 1.6 сая кан.доллар хүртэл зуучлалгүй, хаалттай санхүүжилт багтаж байна.

2019 оны 11 сарын 4-нд Эрдэнэ Ресурс нь эхний санхүүжилт болох 2.5 сая ам.долларыг хүлээн авсан бөгөөд 30 хоногийн дотор зээлийн үлдсэн санхүүжилтийг хүлээн авахаар төлөвлөж байна. Жилийн 10%-ийн хүүтэй энэхүү зээлийг Компанийн сонголтоор капиталжуулж болох бөгөөд гэрээ хүчин төгөлдөр болсноос 36 сарын дараа төлөгдөх нөхцөлтэйгөөр хийгдсэн. Зээлийг дараах хоёр нөхцөлийн аль нэг нь бүрдсэний дараа 25%-ийн нэмэгдэлтэйгээр эргүүлэн төлж болно, үүнд: (1) NI 43-101 стандартын дагуу хийгдсэн эцсийн ТЭЗҮ-ийг бүртгүүлэх эсвэл Эрдэнэ Ресурсийн хяналтын багц солигдох (2) анхны санхүүжилтийн гүйлгээ хийгдсэнээс хойш 24 сар өнгөрсөн. Холбогдох нөхцөлүүдийг хангаснаар нэг, хоёр, гурван жилийн хугацаанд EBRD нь бүх зээл болон хэсэгчлэн хөрвүүлэх сонголтыг хийсэн тохиолдолд нэгж хувьцааг \$0.20 канад долларт суурилж жил тус бүр 10%, 20% болон 30%-ийн нэмэгдэл үнэлгээтэйгээр компанийн Энгийн хувьцаанд хөрвүүлэх боломжтой.

Компани нь 10 сарын 26-нд зуучлалгүй, хаалттай санхүүжилтийн хүрээнд 855,000 кан.долларын баталгааг авч, нэгж тус бүр нь \$0.20 кан.долларын үнэлгээ бүхий 3,800,000 үнэт цаасны нэгжийг гаргаад байна. Үнэт цаасны нэгж бүр нь Компанийн нэг Энгийн хувьцаа болон энгийн хувьцаа худалдан авах эрх бүхий хагас (1/2) Варрант (“Warrant”)–аас бүрдэнэ. Варрант бүр нь санхүүжилт хаагдсанаас хойш 2 жилийн дотор нэг энгийн хувьцааг \$0.30 канад доллараар худалдан авах эрхийг олгоно. Хөрөнгө оруулалтын зуучлалын зардалд Компани нийт \$1,200 кан.доллар төлж, 6,000 варрантыг гаргасан. Энэхүү варрант нь санхүүжилтийн хүрээнд гаргаж буй варранттай ижил нөхцөлөөр хэрэгжинэ.

Санхүүжилтийн багц нь Компанийн Хөндий Алтны Төслийн хараат бус эцсийн ТЭЗҮ, анхны инженерчлэл загвар, хайгуул болон хөрөнгө оруулалтын зардлууд, эргэлтийн хөрөнгөд зарцуулагдана.

## Хөндий Алтны Төслийн тухай

Эрдэнэ Ресурсийн ордууд нь дэлхийн томоохон алт, алт-зэсийн ордуудыг агуулагч Төв Азийн Орогены бүсэд багтдаг Эдрэнгийн террейнд байрладаг. Эрдэнэ Ресурс нь Монгол улсын баруун өмнөд хэсэгт 10 гаруй жил хайгуул судалгааг хийн, өдгөө Хөндий алтны дүүргийг нээн илрүүлээд байна. Хөндий алтны дүүрэг нь өндөр агуулга бүхий алт, полиметаллын хэд хэдэн хэтийн төлөвт талбайг хамардгаас хоорондоо 16 км зайд орших Баян Хөндий, Алтан Нар ордуудыг ашиглалтын шатанд хүртэл хөгжүүлэхээр зорьж байна. Эдгээр ордуудыг хамтад нь Хөндий Алтны Төсөл (“Төсөл”) хэмээн нэрлэдэг.

2019 оны 10 сард Эрдэнэ Ресурс нь Хөндий Алтны Төслийн техникийн тайланг (Хэвлэлийн мэдээтэй эндээс танилцана уу) танилцуулсан бөгөөд энэхүү техникийн тайланд Баян Хөндий ордын (“Bayan Khundii”) урьдчилсан техник, эдийн засгийн үндэслэл (“урьдчилсан ТЭЗҮ”, “PFS”) болон Алтан Нар ордын (“Altan Nar”) шинэчилсэн анхан шатны эдийн засгийн тооцоолол (“АШЭЗТ”) орсон болно. Урьдчилсан ТЭЗҮ-д Баян Хөндий, Алтан Нар ордын татварын дараах өнөөгийн цэвэр үнэ цэн (5% хорогдуулалт бүхий) (“NPV5%”) алтны үнийг \$1,300 ам.доллар/унц байхаар төсөөлөхөд тус бүр \$97 сая ам.доллар, \$24 сая ам.доллараар тооцоологдсон. Баян Хөндий ба Алтан Нарын дотоод өгөөжийн түвшинг (“IRR”) тус бүр 90%, 42% гэж тооцоолсон. Урьдчилсан ТЭЗҮ-д 0-7 жилд Баян Хөндий ордыг ашиглах ба 3.73 г/т дундаж агуулга бүхий хүдрийг боловсруулж, жилд

дунджаар 61,000 унц алтыг илээр олборлох, 7-10 жилд Алтан Нар ордыг ашиглан, 3.46 г/т дундаж агуулга бүхий хүдрийг боловсруулж, жилд дунджаар 48,000 унц алт олборлохоор төлөвлөж байна. Баян Хөндий ордод уламжлалт нүүрсэнд уусгах боловсруулах үйлдвэрийг байгуулахаар төлөвлөсөн. 2019 оны 8-р сард Баян Хөндий ордын ашиглалтын тусгай зөвшөөрлийг авсан бөгөөд компани 2021 оноос эхлэн үйлдвэрлэл эхлүүлэхээр төлөвлөж байна.

Анхан шатны эдийн засгийн тооцоолол нь урьдчилсан таамаглал бөгөөд зарим тооцоололд боломжит нөөц агуулсан. Боломжит нөөц нь урьдчилсан болон эцсийн техник, эдийн засгийн тооцоололд нөөц хэмээн багтаахад геологи, эдийн засгийн хувьд эрсдэл ихтэй. Эдийн засгийн үр ашиг багатай геологийн нөөцийг үйлдвэрийн нөөц, эдийн засгийн тооцоололд багтаахгүй.

### Мэргэшсэн этгээд (геологич) ба дээжлэлтийн протокол

Петер Далтон (Peter Dalton) нь Компанийн ахлах геологич (P.Geo, Nova Scotia) бөгөөд NI 43-101-т заасан мэргэшсэн этгээд ба урьдчилсан ТЭЗҮ, АШЭЗТ-оос бусад техникийн мэдээлэл, Баян Хөндийн эрдсийн баялаг, нөөцөөс бусад мэдээ мэдээллийг Эрдэнэ Ресурсийн зүгээс хянан баталгаажуулсан болно. Бүх дээжийг Улаанбаатар хот дахь Эс Жи Эс ("SGS") лабораторид шинжлүүлсэн. Эс Жи Эс лабораторийн дотоод хяналт шалгалтаас гадна Компани нь тусгай стандарт бэлдэц, хээрийн болон лабораторийн хуулбар, мөн хүдэржилтгүй бэлдцийг ашиглан дээжийн чанарын хяналт, баталгаажуулалт ("QA/QC")-ын протоколыг гүйцэтгэсэн. Бүх дээжид алтны агуулгыг стандарт Хайлуулах аргаар (fire assay), бусад 33 химийн элементийг Индукцын хос плазмет спектрометрийн арга (Inductively Coupled Plasma Optical Emission Spectroscopy) ашиглан тогтоосон. 5 г/т алтны агуулгаас дээш агуулга илэрсэн дээжүүдэд алтны шигшүүрийн шинжилгээ (screenmetallic gold analysis) хийсэн ба энэ нь 500 г дээжний 75 микроноос бага байх 30 г бүхий 3 дээж болон 75 микроноос том байх хэсгүүдэд хийгдсэн алтны хайлуулах (fire assay) шинжилгээнүүдийн жигнэсэн дунджаар илэрхийлэгддэг.

Эрдэнийн дээжлэлтийн протокол нь (хүдэржилт болон чулуулгийн төрлөөс хамаарч) зарим нэг жижиг, хүдэржилтийн дараа үеийн чулуулаг болон хүдэржилтгүй боржинг алгассан, 1 эсвэл 2 метрийн интервалтайгаар, цооногийг бүтнээр нь хамарсан дээжлэлтээс бүрддэг. Дээжлэлтийн интервалыг чөмгөн дээжний гүний метр дээр үндэслэдэг ба геологийн хяналт эсвэл хүдэржилтээс хамаардаггүй болно. Бүх дээжийг чөмгөн дээжний гүний метр дээр үндэслэн алмазан хөрөөгөөр 2 тэнцүү хуваадаг. Хуваагдсан дээжийн талыг дээжний уутанд ялган авч дээжилдэг бөгөөд үлдсэн талыг нь дээжний хайрцагт үлдээн Компанийн Баян Хөндий дэх хээрийн ангид аюулгүй байдлыг ханган хадгалдаг. Бүх дээжийг нэг багцандаа 30 дээж байхаар хуваарилдаг ба багц болгонд стандарт бэлдэц, хүдэржилтгүй бэлдэц, лабораторийн хуулбар болон хээрийн хуулбар дээж буюу дээжийг 4 хуваан, 2-ыг нь 2 тусад нь дээжлэн хийж Улаанбаатар дахь Эс Жи Эс ("SGS") лаборатори руу шууд тээвэрлэдэг. Тээвэрлэлтийг Эрдэнийн ложистикийн гэрээт компани Монруд ХХК гүйцэтгэдэг.

### Компанийн тухай

Эрдэнэ Ресурс Девелопмент Корпораци нь Монгол Улсад суурь болон үнэт металлын хайгуул, төсөл хөгжүүлэлтийн үйл ажиллагаа эрхэлдэг Канад улсад бүртгэлтэй хайгуулын компани юм. Компани нь Монгол Улсын баруун урд бүсэд хайгуул хийх эрх бүхий 4 хайгуулын, 2 ашиглалтын тусгай зөвшөөрлийг эзэмшдэг бөгөөд эдгээр хайгуулын бүсэд хийсэн судалгааны үр дүнд Хөндий Алтны Дүүргийг нээн илрүүлсэн. Эрдэнэ Ресурс Девелопмент Корпораци нь Торонто болон Монголын хөрөнгийн биржүүд дээр бүртгэлтэй. Компанийн тухай дэлгэрэнгүй мэдээллийг Компанийн вебсайт [www.erdene.com](http://www.erdene.com)-оос авч танилцах боломжтой. Компанийн талаарх чухал мэдээллүүд нь зөвхөн Компанийн вебсайтаар дамжин хүрдэг тул хөрөнгө оруулагчид вебсайтаар дамжуулан бодит мэдээллийг авахыг зөвлөж байна.

## Урьдчилсан таамаглал

Зарим мэдээллүүд нь Үнэт цаасны хуулийн хүрээнд урьдчилсан таамаглалуудыг агуулсан болохыг үүгээр мэдэгдэж байна. Урьдчилсан таамаглал нь урьд болж байсан болон ирээдүйд болох бодит баримт биш ба зөвхөн ирээдүйн төлөвлөгөө, стратеги, төсөл, нөхцөл байдалд тулгуурласан үзэл баримтлал, магадлал болон таамаглал болно. Энэхүү таамаглалууд нь тодорхой үндэслэлд тулгуурласан боловч баталгаа биш юм. Компанийн үйл ажиллагаа нь олон хүчин зүйлээс шалтгаалах бөгөөд зарим хүчин зүйлс нь Компанийн хяналтаас давсан байх магадлалтай ирээдүйд учирч болох хүчин зүйлс юм. Материаллаг өөрчлөлт үзүүлэх боломжтой хүчин зүйлсэд эрдсийн зах зээлийн үнэ, хайгуулын үр дүнгүүд, бизнесийн болон зах зээлийн орчин, эдийн засгийн байдал болон санхүүжилт, хөрөнгө босголт зэрэг орно. Дээр дурдсан мэдээллүүд нь ирээдүйд өөрчлөгдөн хувирах магадлалтай. Компани нь Үнэт цаасны хуульд өөрөөр заагаагүй тохиолдолд Урьдчилсан таамаглалыг өөрчлөн, шинэчлэх үүрэг хүлээхгүй.

**ЭНЭХҮҮ МЭДЭЭЛЛИЙГ ОЛОН НИЙТЭД ТАНИЛЦУУЛАХАД ЯМАРВАА НЭГЭН ЗАСАГ ЗАХИРГААНЫ БАЙГУУЛЛАГА ЗӨВШӨӨРСӨН, ҮЛ ЗӨВШӨӨРСӨН МЭДЭГДЭЛ ХИЙГЭЭГҮЙ.**

## Холбоо барих:

Петер К. Акерли, Ерөнхийлөгч болон Гүйцэтгэх захирал

Роберт Женкинс, Санхүү хариуцсан захирал

Утас: (902) 423-6419

Twitter: <https://twitter.com/ErdeneRes>

Facebook: <https://www.facebook.com/ErdeneResource>

LinkedIn: <https://www.linkedin.com/company/erdene-resource-development-corp/>

YouTube: <https://www.youtube.com/channel/UCILs5s9j3SLmya9vo2-KXoA>